

Date – 05/07/2025

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Mizo Hmeichhe Insuihkhawm Pawl (MHIP) Day chu Mizoram hmun tam zawkah vawiin khan hman a ni.
2. Mizoram leh Myanmar ramri ah helho inkah avangin vawiin khan mi 500 chuangin himna zawngin Zokhawthar kaltlangin Mizoram an lut.
3. Prime Minister Narendra Modia chuan vawiin khan Argentina khawpui Beunos Aires a thleng
4. Union Home and Cooperation Minister Amit Shah chuan vawiin khan ramchhunga Cooperative University hmasa ber Tribhuvan Sahakari Vishwaviyalaya chu Gujarat-a Anand ah a hawng.

<><><>

MHIP DAY

Mizo Hmeichhe Insuihkhawm Pawl (MHIP) Day chu naktuk July ni 6 hi a ni a, Pathianni a nih avangin vawiin khan Mizoram hmun hrang hrangah an hmang a, Thawhtannia hman tum an awm bawk.

Tun dinhmunah MHIP hian Sub-hqrs 10, Block-30, Joint-7 leh Branch 766 an nei a. Member hi nuai 3 chuang an awm mek bawk a ni. Kum 2023-2025 chhung atana kumpuan 'Dikna leh Rinawmna Chawinun' tih a nih angin Day lawmna-ah pawh hian he thupui hmanga thusawi ngaihthlak a ni.

Champhai District-ah chuan khuah leh veng hrangah member-ten intihhlamna leh thupui thlan bikte sawiin hun hman a ni a, tlaiah lawmna ruai an kil ho. Sub-hqrs. hruaitute chu khua leh veng hrang hrangah insem darhin hun an hmanpui a, chawhma lam khan Sub-hqrs. hruaitute hian DAY denchenin - District Hospital, TNT, Synod Rescue Home, AIDS do Pawl, Gosen Home leh Emanuel Rescue Home-ah te Rs.5,000/- theuh an hlan.

Serchhip Kawnpui VC Hall-ah Serchhip Kawnpui South Branch MHIP te chuan Serchhip Sub Hqrs hruaitute nen an hmang a. One Stop Centre, Women & Child Development, Social Welfare Department Serchhip atangin 'Hmeichhiate Venhimna' chungchang zirtir an ni.

Kolasib Sub-Hqrs hnuaia Branch thenkhat chuan member hrisel lohna avanga harsatna tawk te tanpui in, Branch thenkhat chuan veng chhung thenfai hnattlang an nei a, thenkhat chuan chawimawi phute an chawimawi bawk.

MHIP Sub Hqrs. Lawngtlai hnuaia Branch te chuan midang tana thiltha tih nan an hmang a, an huam chhungah faina hnattlang te neiin, tanpui ngai tanpui nan te an hman bakah Damdawi in lamah thilpek hlante pawh an awm. Branch thenkhat awmni khama intihhlamna leh infuihthar na neia, ruai nen alawm an awm bawk.

<><><>

MP RICHARD

Lok Sabha MP Pu Richard Vanlalmangaiha chuan Mizo te chuan tlawmngaiin midang tan thisen an pe thin a, tanpui ngaite tanpui tura tlawmngaihna chu chhawm nun zel a duh tih a sawi.

Tukin khan Pu Richard Vanlalmangaiha hian Association for Voluntary Blood Donation (AVBD) hnenah an hman turin Bus a pe a, mi 12 chuan theihna Bus hi MP Fund atanga pek a ni.

Aizawl Civil Hospital-a Model Blood Bank kawta hun hmanah Pu Richard Vanlalmangaiha chuan MP a nih hnuah a Fund atanga program hman hmasa ber a nih thu a sawi a, hna thawh nana tangkai tak ni tura a hriat avangin a ngaipawimawh tih sawiin, kum 1999 January thla atangin India rama Supreme Court chuan man nei a thisen pek a ti tawp a, chumi hnuah hnam dangin thisen pek dan kalhmang an ti danglam a, Mizo te erawh chuan hemi hma hian a thlawna thisen pek an kalpui tawh a, tunah chuan hnam dang pawhin Mizo te kal dan angin an kal ve tawh a ti.

Byte: Pu Richard Vanlalmangaiha

Senior Medical Superintendent Dr. Lalchhuankimi chuan, kuminah Blood Donation Camp vawi 81 an neih tawh thu a sawi a, thisen an lakkhawm te chu sorkar damdawi in bakah mimal damdawi in hrang hrang ten an lachhawng leh thin, a ti.

Byte: Dr. Lalchhuankimi

Bus hlanna hunah hian AVBD President Pu C. Lalnunrema pawhin thu sawiin, Mizoramah tlawmngai pawl leh kohhran thalai pawl hrang hrang ten thisen an pe nasa tih a sawi a, mimal zingah pawh thahnem ngai taka epe thin a awm a, midang tan malsawmna an ni, a ti bawk.

<><><>

BORDER TENSION ESCALATES

Falam helho CNDF ten Hualngo ram mipui sipai CDF te Camp lain Hualngo ram an thuhnuaiah an dah ni a thudawn a ni.

Tukin dar 8:30 vel atang khan Zokhawthar bul, Tiau lui kama Khawmawi khua a Chin National Defence Force (CNDF), Falam lam mite leh

CDF - Chin Defence Force (Hualngo sipai) te an in kap a, CNDF ten Hualngo rama Hualngo Sipai, CDF te awp chin a Camp zawng zawng chu luhchhuakin, an thuhnuaiah an dah fel a, CDF te awp Camp pariat atangin CDF te hi an taksa himna zawngin an tlan darh vek tih CDF hotute hnen atanga dawn a ni.

Zokhawthar Branch YMA chuan Information Centre atangin mipui hriattirna, ralkhel dar ti riin Helho inkahna avangin Zokhawthar ah silaimu thahnem tak a rawn leng phei a, mipuite fimkhur tura chahin pawn a chhuak lo turin an inhriattir a, hemi hnu hian Helho inkap mekte chu Zokhawthar lam hawia an silaite hmetpuak tawh lo tura ngenin, Zokhawthar mipui nun ti ralṭi zawnga Silai an hmetpuak lui zel anih chuan Zokhawthar a Myanmar atanga raltlan zawng zawngte, Zokhawthar atang Khawmawi ah dah phei vek an nih tur thu an hriattir a ni.

SFX

Vawiin khan CDF tam zawk chu Mizoram lamah lo lutin chawhnu dar 2:40-ah Silai puak pawh a reh a. He inkahna avanga thi leh hliam zat hriat theih a ni rih lova, CDF hliam tuar 5 zinga pakhat Champhai District Hospital-ah lak niin midang chu Zokhawthar damdawi inah enkawl an ni.

Champhai DC Pu Mohammed Aaquib hnen atanga thu dawn danin Zokhawthar mipui thlamuana, a tul anga hma la turin Champhai atangin Executive Magistrate tirh phei nghal a, Silpauline leh Blanket engemawzat raltlan tharte hman turin a pe a.

Hel pawl pahnih te hi ramri a in sumdawn tawna an thuhnuaia a dah an duh vanga inkap ni a thudawn a ni a, nizan thim hlimah khan helpawl pahnih, (CNDF) leh PDF te chu reilote an inkap a, mi pahnih in nunna an chan ni a sawi a ni. Tun dinhmunah inkahna avanga hliam tuar PDF mi 4 leh CNDF mi 2 te Zokhawthar damdawi in a enkawl turin lak an ni a, nizan lam atangin Khawmawi atang hian mi thahnem tak an rawn tlanche lut a, Mizoram lam pana tlanche zat hi hriatfiah theih a ni lova, hriat theih hnahnung berah mi 500 zet chu an tling tawh a ni.

<><><>

STREET VENDORS

Aizawl Tennis Court leh a chhehvela thlai thar zuar thinte chuan vawiin nileng khan kawngpui sirah an thlai thar te an zuar chhuak thei a ni.

Aizawl Tennis Court leh a chhehvela thlai zawrh hi Aizawl Municipal Corporation (AMC) chuan a phal tawh lo a, an thlai zawrhna tur hmun bik siamsak an ni a, amaherawhchu thlai zuartute chuan an hmun siamsakah hian an leng lo niin an sawi thung.

Aizawl khaw chhehvel khaw hrang hrang atangin thlai zuar hi an kalkhawm thin a, Zirtawpni zanah tlaivarin an thut pui a, a tuk Inrinniah an zuar nileng thin bawk a, Inrinni vawi hnih chu thlai zuartu leh AMC thuneitu lam an innawr buai a, vawiinah erawh inhnawhdarh emaw ang chi buaina a thleng lo a ni.

Tunkar khan Urban Development & Poverty Alleviation (UD&PA) Minister Pu K. Sapdanga hoin an chungchang hi ngaihtuah a lo ni tawh a,

kawng kama chawmhmeah zuara thu thinte harsatna sukiang tur leh an thutna tur hmun dang ngaihtuah turin Working Committee din ni se tiin an rel a. Anni hian Aizawl khaw chhung veng hrang hranga chawmhmeah zuara kawngkama thu thinte chu traffic ti buai lo leh felfai zawka an thut theihna tur hmun an ngaihtuah dawn bawka a ni.

<><><>

GINGER

Mizoram sorkar hmalakna lian zinga mi, District Agriculture Marketing Committee (DAMC) hnuaia sawhthing lei runpui hmasa chu khar a ni a. District hrang hrang zingah Khawzawl District chuan lei tam berin sawhthing hi kg nuai 46 sing 9 leh 1,036 an lei a ni.

Nimin khan Khawzawl DC Auditorium-ah kumin atana Sawhthing lei runpui kharna chu hman a ni a. District Bawrhsap Pu K. Vanlalthiana chuan Khawzawl District-ah DAMC hmalaknaa loneitute thar chhuah Sawhthing lei runpui neih zawh taka hlawhtlinna chu a buaipututen tha taka an mawhphurhna an hlen chhuah vang leh thawh hona tha tak an neih vang a ni a ti a, nakin zelah pawh thawhhona tha tak neih zui zel a pawimawh tih a sawi.

DAMC Member Secretary leh District Agriculture Officer ni bawka Pi Lallawmzuali'n he huna a tarlan danin, Khawzawl District-ah kumin February ni 20 atanga tun thla July ni 3 thleng khan Sawhthing hi lei a ni a. Khawzawl District-ah hian Sawhthing leina hmun Secondary Collection Centre hi Khawzawl, Khawhai, Puilo, Rabung, Chawngtlai, Sialhawk bakah Zawlnghak Farmers Producer Company-ah te siam a ni a. Sawhthing hi loneitute hnen atangin kg 1 Rs 50 zelin an leisak a. Sawhthing leituten an lei ngamna zat atanga Rs 50 tlinna tura sum sen ngai chu Sawrkarin a tum ve thung a ni.

<><><>

AIR NEWS

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah a ni.

Naktuk zing dar 7 leh a chanve ah Chanchinthar puan leh a ni ang.

<><><>

ASI

Archaeological Survey of India Director (Monument) AMV Subramanyam chuan vawiin khan, Lianpui khua a pi pu sulhnute tlawhin ramchhung hmun pawimawh a puan a nih theihna tura hmalak ngaite a enfiah.

Director hi Lianpui khawtlangin kawtchhuah-ah an lo hmuak a. Lianpui khua a Lungphun Ropui hi Archaeological Survey of India chuan kum 2021 khan National importance a puan a nih theihna turin Preliminary notification a lo ti chhuak tawh a. Director AMV Subramanyam chuan Delhi-a a let leh hunah thil tihfel ngaite a tihfel ang a, hun rei lo te chhungin Lianpui khua a Lungphunte chu National importance-ah puan a ni ang, a ti.

Lianpui Welfare Aizawl chuan final notification chhuah a nih theihna tura hma lakpui tu Art & Culture Pu C. Lalsawivunga leh Rajya Sabha MP Pu K.Vanlalvena chungah lawmthu an sawi.

<><><>

PM

Prime Minister Narendra Modia chuan vawiin khan Argentina khawpui Beunos Aires a thleng. Ram panga tlawh tura zin PM Modia hian a pathumna tan tukin khan Argentina a thleng leh a. Argentina-a khawsa India mi thahnem takin an lo hmuak a ni.

Prime Minister hian zaninah sawrkar aiawh inbiakna hun a hmang dawn a. Argentina leh India thawhdunna tur kawng thar tam tak an sawiho dawn niin kan correspondent chuan a sawi.

Nizan khan Prime Minister Narendra Modia chu Trinidad and Tobago chawimawina sang ber Order of Trinidad and Tobago hlan a ni. PM Modia hi Trinidad & Tobago President Christine Carla Kangalooi'n a hlan a. Thusawiin Pu Modia chuan a chawimawina dawn chu India mi vaibelchhe 140 chuangte aiawha dawng anih thu a sawi a ni.

<><><>

UNION COOPERATIOIN MINISTER

Union Home and Cooperation Minister Amit Shah chuan vawiin khan ramchhunga Cooperative University hmasa ber Tribhuvan Sahakari Vishwaviyalaya chu Gujarat-a Anand ah a hawng. Thusawiin Pu Shaha chuan kum li kalta chhungkhan Union Ministry of Cooperation chuan hmalakna thar 60 a neih thu a sawi a. He Ministry hi mi rethei leh thingtlang mi vaibelchhe chuangte beiseina siamsak tura din anih thu a sawi a ni.

<><><>